




Literatura den Bon Dia

Ernesto E. Rosenstand



TUR COS A KEDA ATRAS

Den su bida poco tabata port'e, ma su yiu mayo, Caspar, tabata tur su ilusion. Con straño cu por sona, ma e tabata e yiu cu e tabata stima mas hopi. E mes no tabata sa pakico. Ma asina tabata. Tin biaha e tabata kere pasobra e tabata su prome yiu, ma di esei e no tabata di e sigur ei. Kisas tabata pasobra e tabata su prome yiu? Kisas, ma e no por a bisa si en berdad esei tabata e caso.

E por tabata un homber cu poco sentimento pa su casa, ma Caspar tabata su preto di wowo. P'e e tabata tur cos. E tabata stim'e mas cu e otronan. Maske e mes no tabata admiti esei. Ma tur hende tabata ripara cu e tabatin un stimacion special pa Caspar. Te asta su otro yiunan.

Kisas esei tabata pasobra e tabata su prome yiu. De bes en cuando e tabata corda e momento cu Ana a bin trece e noticia cu e tabata na estado. Y esei a haci cu el a bin casa cu ne. Y el a bira mas contento ora cu e tabata un mucha homber.

Y ora cu docter a bis'e con malo Caspar ta y cu miho e bai cu ne mas leu, Juan a compronde cu e mester haci tur cos pa scap'e. El a sigui conseho di docter y a hib'e Merca.

E por a hib'e otro caminda, ma docter a conseh'e Merca. Aya nan tabata mas avansa den tratamento di e malesa aki. E docternan na Aruba tabatin contacto cu e docternan na Merca. Y no tabata di e leu ei.

Docternan aki na Aruba ta duna masha poco fiat pa hiba enfermo afo. Ta parce cu ta asunto di privilegio bo mester tin pa nan manda un hende afo bai busca su salu. Nan ta di opinion cu aki mes por yuda e pashentnan. Y awo cu su docter a bis'e asina lihe cu miho e bai mas leu Juan no a duda ningun momento.

El a compronde e seriedad di e caso. E no a pensa dos biaha. A drecha pura pura tur cos y a bai cu henter e famia. Den masha poco tempo el a regla su asuntonan y a percura pa combina e biaha aki cu negoshi.

Tabata net un bon oportunidad pa e por haci esei. El a laga Arturo encarga cu su negoshi durante su ausencia. Arturo tabata un persona cu tabata traha cu ne for di basta tempo caba y e tabata un homber di confia.

Na cuminsamento e kier a bai so cu e mucha, ma despues el a bin tuma aden pa nan tur bai. Esei pasobra Ana a insiti pa e cu e otronan bai tambe. Y Juan a tuma aden. El a compronde cu maske lo bai ta pa un tempo cortico no por parti e famia pa algun tempo.

Nan a huur un cas na Merca y asina nan por a hiba un bida familiar e lunanan ei. Loke pa hopi tempo no tabata e caso. Caspar a keda dos siman den hospital pa haci diferente test y despues e por a bai cas pa aki sigui cu su tratamento.

Afortunadamente no tabata di e serio ei manera nan a kere na Aruba. Y tur cos tabata muestra cu e tabata bayendo den bon caminda. Despues di a dun'e diferente remedi. Algo positivo pa nan. Pa nan tabata un alivio grandi. Un peso a cai for di nan lomba.

Juan no a conta Carmen nada di esaki. Carmen no tabata sa cu Juan tabata un homber casa. El a bis'e cu e

mester bai Merca pa algun tempo relaciona cu su negoshi y Carmen a ker'e.

Durante cu e tabata na Merca a keda ta pensa riba dje. E tabata haya su falta. Ma e por a domin'e. Su atencion tabata mas tanto pa su yiu. Esei tabata e caso cu Carmen tambe. Esaki no tabata compronde con esei por tabata posibel. Poco poco Juan a cuminsa drenta den bida di Carmen. El a experiencia cu Juan tabata birando un pida di su bida. Y p'esei mes tur ora e tabata pensa riba dje. Mas tanto fin di siman.

E dianan ei e tabatin custumber di topa cu ne. Na Merca nan a bin cura Caspar completamente. Ma e mester a keda mas hopi di loke a kere. Docternan kier tabata sigur cu e tratamento a duna resultado, prome cu lague bin Aruba.

Na naturalmente cu durante su estadia na Merca el a busca algun agencia mas pa su negoshi. Tabata net bon pasobra delaster tempo negoshi tabata bayendo basta malo p'e. Y e kier a mira si dor di haya algun agencia mas lo e por drecha su situacion financiero.

E tabatin suerte, ya cu el a haya basta cas cu tabata interesa den su servicionan. Y nan tabata buscando hende pa representa nan na Aruba.

Despues di a regla tur asunto y docter a bisa cu Caspar ta completamente bon nan a bin bek.

10

Despues di su yegada Ruba tabata parce cu e malesa di Caspar a bin convirtie. E tabata un otro Juan. Uno completamente otro di esun prome cu nan a bai Merca pa malesa di e yiu. E tabata keda masha hopi cas.

E tabatin mas atencion pa e muchanan. Nan estadia na Merca a yuda den esaki. Aya e tabata keda mas hopi na cas. E no tabata conoce hopi hende ni tampoco e lugarnan unda e por a bai core su parandanan.

Y esei mes a percura pa e no haci asina hopi escapada. Na Merca dor di cu e no tabata conoce hende e tabata sali masha poco. Y esei mes a percura pa e dedica mas tempo na e famia.

Y despues cu el a yega Ruba el a keda pa un tempo cortico cu e custumber aki di keda cas y dedica mas tempo na su yiunan. E no tabata haci asina hopi su escapadanan. Maske de bes en cuando e tabata sa bin cas mas laat cu di custumber. Ma no di e hopi ei.

Nan estadia na Merca tambe a yuda, ya cu aya e tabata hopi na cas y di e manera ei el a bin sinti e sabor di un hogar. Loke delaster tempo e no tabata conoce aki na Aruba.

Despues di trabou e tabata bin cas tempran y tabata hunga mas cu e muchanan.,